

AruAnti Art Expo 2008 "RASTRO" di Elvis Tromp y Edmond Tujeehut

A YAMA DANKI NA UN MANERA HOPI SPECIAL NA SPONSORNAN, ARUBA Y ANTIYAS



STA. CRUZ -- AruAnti Art Expo 2008 titula "RASTRO" di Elvis Tromp y Edmond Tujeehut a yama danki na un manera masha special na e sponsornan di mas grandi di e proyecto di arte unico aki. E proyecto aki tabata uno cu a consisti di un exhibicion di 30 pintura di e artistanan local Elvis Tromp y Edmond Tujeehut. E Exposicion aki a habri na Aruba dia 12 di September 2008 den e sala di exhibicion chiquito na Cas di Cultura. E proyecto aki a keda presenta tambe na luna di April 2008 na Curacao y na Juni 2008 na Bonaire. Despues di e apertura unico y den presencia di mas di 500 hende na Aruba, na unda cu Elvis y Edmond a uni hunto cu Nico Connor ariba Steelpan y Marlon Mathew su grupo di Capoeira, awor a toca turno pa separa e cuadro principal di e proyecto y haci locual a ser presenta na inico di esaki. Esta, cu a corta e cuadro principal di e proyecto titula "RASTRO", cual a ser pinta pa Elvis y Edmond, den 9 pida y reparti esaki entre esnan cu mas a contribui na e exito di e proyecto aki. Durante di un conferencia di prensa

diabierna dia 17 di Oktober, Elvis y Edmond a yama danki na tur e sponsornan y a haci entrega oficial di e diferente seccionan di e cuadro RASTRO como muestra di aprecio pa nan contribucion. E obhetivo principal di e proyecto aki tabata, pa presenta imagennan a traves di pinturanan, cu lo enfatiza locual cu Antiyas Hulandes y Aruba tin den comun. E titulo cu a ser escogi pa e proyecto aki ta RASTRO. Husando e tema aki, e artistanan ta explora e conexcion entre e islanan di Antiyas Hulandes y Holanda a traves di e uso di color y visualizacion di e cultura di Antiyas Hulandes y Aruba. Elvis Tromp durante di e conferencia a bisa cu esaki ta e prome edicion di AruAnti Art Expo, y e idea di e artistanan envolvi den e proyecto aki ta, pa ripiti e exposicion aki anualmente. Ta e intencion tambe pa expande e proyecto aki den futuro door di invita otro artistanan for di e otro islanan di Caribe Hulandes pa participa den e siguiente AruAnti Art Expo nan.

E cover di e catalogue tin un significado especial y a ser pinta door di e dos artistanan Elvis Tromp y Edmond Tujeehut. Esaki ta simboliza e cara di e proyecto, cual ta un trabao di arte combina di e dos artistanan aki. Un potret a ser saca di e pintura original pa recuerdo. Sinembargo, e pintura original mes a ser corta den 9 pida. Cada sponsor principal di e proyecto aki lo ricibi un pida di e pintura unico aki y un portret di e pintura completo despues cu e exposicion su tour termina. Esaki ta e forma pa trece dilanti na e publico, e tema di e exhibicion aki, cual ta cu tur pida poni hunto lo semper forma un imagen uni masha bunita. Esaki ta simboliza e visualizacion di e vision di

AruAnti, cu ta: Nos tur ta parti di henter e universo y nos por semper bini hunto manera uno. Esaki ta tabata proyecto hopi valioso y sigur a contribui na e avance di e intercambio cultural entre e islanan. AruAnti ta consciente cu esaki ta un proyecto hopi grandi cu lo trece e islanan mas cerca di otro y lo enriquece e cultura di nos futuro generacionnan. AruAnti Art Expo 2008 a habri pa prome biaha na Curacao, na Curacao Museum na luna di April y a keda habri pa 1 luna eyan. E la habri na Bonaire, na Kas di Arte na luna di Juni y a keda habri eyan pa un luna tambe. E sponsornan principal cu a haci e proyecto aki posibel ta: Unoca, representa pa Directora sra. Lupita Gil y Presidente di Board, sra. Nilda Koolman,. Prins Bernhard Cultuurfonds Nederlandse Antillen en Aruba, cual a keda representa pa sra. Des Croes miembro di bestuur. Valero Refining Co. Aruba, cual a keda representa pa sra. Mariaine Arends Croes. Un danki special a bay na C&BM N.V, representa pa Mirurgia Marchena. The Curacao Museum Foundation tambe lo ricibi un seccion di e cuadro. Kas di Arte nan Boneiro ya a ricibi su pida cuadro caba. Romar Trading, representa pa sr. Figaoa tambe a ricibi nan seccion di e cuadro RASTRO. Un danki ta bay tambe na Lotto pa Deporte, Fundacion Mi Cutisa y na tur esnan cu di un forma of otro a contribui pa haci e proyecto aki posibel y sigur uno exitoso. Danki!

